

(伯曜)

蓋聞神道無私。以庇民爲主義。錢能使事。仗人力爲扶持。是以財帛星君。享受人間之香火。運財童子。轉移世上之金錢。禍福難逃。由人。愛憎本當無我。乃文章厄命。貧窮之孽。作無靈。生計時艱。原富之新書空讀。漫說高門鬼瞰。何非富有千金。頓教陋巷人居。竟至窮無寸鐵。是皆爾錢神趨炎附勢。好爲錦上添花。媚富驕貧。不肯雪中送炭。遂使金錢世界。弄成種種奸謀。傀儡人羣。造出般般罪孽。揆諸醜態。能不痛心。爰貢罪言。藉伸詰責。

党人事政。廣納苞苴。黜陟羣僚。惟錢是視。汝錢神奉令趨承。毫不梗阻。以至權門等市。干進者狂。汝罪一也。

官家揮霍。忍剝民脂。雜費軍捐。中外焚索。汝錢神輸誠上獻。惟恐延遲。以至凡百苛抽。民生困苦。汝罪二也。

汚吏貪墨。罪惡昭彰。賂賄公行。是非顛倒。汝錢神低心下氣。任彼煎熬。以至銅臭熏天。封冤不恤。汝罪三也。

社會心理。注重平康。專利魔王。爲世詭病。汝錢神徇私袒庇。無稍抗爭。以至勞勩農工。備受修制。汝罪四也。

守財之虜。視錢如命。大秤小斗。貽害閭里。汝錢神助成計算。利己損人。以至厚藏多積。遺孽子孫。汝罪五也。

逋逃潛棍。自號要人。哄騙華僑。供彼揮霍。汝錢神竟同助孽。甘爲牢籠。以至海外同胞。痛心疾首。汝罪六也。

漢奸恃勢。流毒鄉井。黑心之錢。百計訛訟。爾錢神樂爲指使。飽濟食囊。以至魚肉村夫。有冤莫訴。汝罪七也。

奸商居奇。高起物價。藉勢發財。無非網利。汝錢神嗜利成癖。不加阻撓。以至大地民生。同遭浩劫。汝罪八也。

右此八者。固罪狀之顯而易見者。其餘種種罪惡。實擢髮難數也。問汝錢神。亦知罪否。倘其聽此罪言。洗面革心。毋受人責。毋遭天罰。有厚望焉。